

## LEWIS, Syr GEORGE CORNEWALL (1806 - 1863), gwleidyddwr

**Enw:** George Cornwall Lewis

**Dyddiad geni:** 1806

**Dyddiad marw:** 1863

**Rhiant:** Thomas Frankland Lewis

**Rhyw:** Gwryw

**Galwedigaeth:** gwleidyddwr

**Maes gweithgaredd:** Gwleidyddiaeth a Mudiadau Gwleidyddol

**Awdur:** David Williams

Ganwyd yn Llundain, 21 Ebrill 1806, mab hynaf [Syr Thomas Frankland Lewis](#). Cafodd ei addysg yn ysgol Eton ac yng Ngholeg Eglwys Crist, Rhydychen, a derbyniwyd ef yn fargyfreithiwr yn 1831. Bu'n gweithredu ar amryw gomisiynau ymchwil y Llywodraeth; yn 1839 dilynodd ei dad fel comisiynwr o dan Ddeddf y Tlodion ('Poor Law Commissioner'). Bu'n gyfrifol i raddau helaeth iawn am y ' Poor Law Amendment Act,' 1841. Pan sefydlwyd y ' Poor Law Board ' yn 1847 - ac yr oedd Lewis yn cydolygu â chymryd y cam hwn - daeth ei swydd ef i'w therfyn. Daeth yn aelod seneddol dros swydd Henffordd yr un flwyddyn; bu'n dal tair swydd nad oeddynt yn bwysig; eithr collodd ei sedd yn 1852. Yna daeth yn olygydd yr *Edinburgh Review*, 1852-5. Pan fu ei dad farw fe'i dilynodd yn aelod seneddol bwrdeisdrefi Maesyfed, a daeth ar unwaith yn ganghellor y trysorlys yng ngweinyddiaeth gyntaf Palmerston (1855-8). Yn ail weinyddiaeth Palmerston bu'n ysgrifennydd cartrefol ac wedyn yn ysgrifennydd rhyfel. Bu farw yn Harpton Court, 13 Ebrill 1863, yn 56 oed. Ceir rhestr o'i gyhoeddiadau niferus yn y *D.N.B.* ' The most rapid political rise of our time ' oedd disgrifiad Walter Bagehot o'i yrfa.

### Awdur

Yr Athro Emeritus David Williams, (1900 - 1978)

### Ffynonellau

*Oxford Dictionary of National Biography*

G. F. Lewis (gol.), *Letters of the Right Hon. Sir George Cornwall Lewis, bart., to various friends* (Llundain 1870), 1870

S. Webb and B. Webb, *English Poor Law History I. The old Poor law. - II. The last hundred years* (Llundain Efrog Newydd 1927-29), Part II, The Last Hundred Years, 1927

### Darllen Pellach

Erthygl Wicipedia: "[Syr George Cornwall Lewis](#)"

## Dolenni Ychwanegol

VIAF: [lewis-george-cornwall-sir-1806-1863](#)

Wikidata: [Q1230681](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

